

Oz è Nomnasontga u igl De digls morts



NOVEMBER

Nomnason tga ed igl De digls morts

Igls pi blers deis dattigl per far attent ad ensatgi tgi veiva, scu per exaimpel igl De digl giat u igl De digl tgang. Igl 1. ed igls 2 da november è chegl en zichel oter, chels deis pansagn nous a tot igls tgers carstgangs tgi èn gio morts.


Nomnason tga, igl 1. da november, è en de religious dalla Baselia catolica per festivar e pansar a tot igls sontgs. Perche gl tgi chel de è er en firo, e varsaquantas persungas on liber, vonigl sen santieri per visitar las fossas da paraints u ameis tgi èn gio morts.

Ainten la religiun cristiana ins crei, tg'igls carstgangs vegian en'olma, da mai tgi seian duple tgi en corp. L'olma è chegl tgi fò unic mintga carstgang, scu tgi el resainta e painsa. Aint igl cristianissem ins crei, tgi l'olma geia ainten parveis, cura tgi igl carstgang mora. Perche gl ègl igls 2 da november igl «De digls morts» ed alloura, u gio en de pi bod, ins metta flours u candeilas sen la fossa d'ena persunga morta.

Chella tradiziun digl sa regurda digls morts e da lour olmas dattigl er an bleras otras teras sen chest mond. Ma igl è betg dapertot ensatge trest.

Ainta Mexico per exaimpel, ò chel de nom «Día de los Muertos» ed igl è en de da festa plagn calour. Las Mexicanas ed igls Mexicans creian tgi igls morts returnan chel de a tgesa per visitar lour famiglias. Perche gl decoreschan els las tgesas e las fossas cun flours da palpieri an tottas calours. I dat dultschems an furma da tgavazas u skelets ed igls carstgangs reian, soltan e rachintan dallas persungas tgi èn mortas.

Per las Mexicanas ed igls Mexicans è la mort betg ensatge sgarschevel, mabagn ena part dalla veta. Perche gl festiveschan els igl De digls morts u igl De dallas olmas scu gronda festa plagn legreia.




**Ast te er gio santia digl
«De digls morts» u digl
«Día de los Muertos»?**



Ideias per sa regurdar e render onour agls morts

1



Fò en bel maletg
cun calours d'ava.

Varda en album da fotografias vigl,
noua tgi te cattas fotografias dallas
persungas tgi èn betg ple tar nous.

Screiva ena carta u ena poesia.


Rachinta ad ensatgi dalla tia famiglia
tgi è pi gioven tgi te, d'en paraint tgi
veiva betg ple.

Fò en dessert u ensatge oter damagler
tgi la persunga morta veva gugent
u tgi totga tar la nossa tradiziun da
famiglia.



Ist gio stada u sto eneda sen en santieri? En santieri è en li spezial. Ins dei tgi igls morts cattan cò lour pòss, damai ègl da star fitg quiet sen santieri. Chegl ò er da far cun respect visavi agls confamigliars ed ameis tgi visetan las fossas. Te vignst a

t'accorscher – sen santieri rigia en'atmosfera fitg speziala. Ins na stò betg aveir tema, ma tuttegna ègl migler da visitar en santieri ansemen cun ena persunga carscheida. Cun la persunga carscheida post te discutar las dumondas sotvart e tot chegl tgi at vign andamaint, arisguard igl tema veta e mort, durant la vossa viseta sen santieri.



Dattigl ena fossa dad en paraint sen santieri?

Tschertga la pi bela fossa sen santieri.

**Varda las datas sen igls craps da fossa.
Cura èn las persungas nascheidas?
Cura èn ellas mortas?**

Tge creist te: Scu on ellas vivia?

Decorescha ena candeila da morts

3

Te dovras:

- ena candeila da morts sainza decoraziun
- calours per malager sen vèder u fleters permanents
- tatgeders permanents
- oter material per decorar scu bindels da calour, curals, plemas, etc.

Ponderescha per tgi tgi te vot decorar la candeila da morts. Tgenegnas eran las calours prefereidas da chella persunga? Ò chella persunga gia en animal da tgesa u en hobi spezial? Malegia ensatge tgi vo a pro cun la persunga. Fò igl ampren ena skizza sen en palpieri e pir siva segl cup dalla candeila. Decorescha la candeila cun bindels da calour e tatga se anc oter material da decoraziun. Schi te vot decorar ena candeila da morts per ena persunga tgi te canoschas betg, t'imaginescha simplamaintg, tge tgi chella persunga pudess avoir gia gugent. Te post er malager simbols scu cors, steilas u crouschs. Porta la candeila sen santieri e la metta sen la fossa.

